

**Perancis selesaikan siasatan fasa pertama terhadap flaperon MH370 - JACC**  
**Astro Awani**  
**Ogos 19, 2015**

**KUALA LUMPUR:** Pasukan siasatan diketuai Perancis sudah menyelesaikan pemeriksaan fasa pertama ke atas flaperon pesawat MH370.

Pusat Penyelarasan Agensi Bersama Australia (JACC) berkata pihak berkuasa Perancis akan melaporkan mengenai perkembangan siasatan itu dalam masa terdekat selepas berbincang dengan Malaysia.

"Pasukan siasatan Perancis bekerja secepat mungkin untuk menyediakan maklumat yang lengkap dan boleh dipercayai," kata JACC dalam kenyataan yang dikeluarkan di sini, hari ini.

JACC juga berkata para pegawai dari Australia, Malaysia dan China dijangka bermesyuarat di Canberra pada awal September ini.

"Mesyuarat itu akan membolehkan maklumat dikongsi bersama antara ketiga-tiga negara serta berbincang mengenai operasi pencarian.

"Mesyuarat itu akan memberi tumpuan kepada perancangan bagi memastikan misi mencari dijalankan secara efisien dengan mengambil kira jangkaan cuaca baik semasa bermulanya musim panas," kata kenyataan itu.

Pada 6 Ogos lepas, pakar-pakar antarabangsa mengesahkan bahawa flaperon yang dijumpai di Pulau Reunion milik Perancis bulan lepas adalah milik Penerbangan MH370, yang menyokong kesimpulan sebelum ini bahawa pesawat MAS itu terhempas di selatan Lautan Hindi kira-kira 17 bulan lepas.

Sementara itu, kapal-kapal Fugro iaitu Discovery dan Equator, kini kembali menyertai misi mencari pesawat MH370 di selatan Lautan Hindi.

"Kapal Fugro Discovery tiba pada 12 Ogos manakala Fugro Equator akan kembali selepas menjalankan rutin menghantar bekalan hari ini (19 Ogos).

"Kapal-kapal itu akan menjalankan operasi mencari sehingga pertengahan September," kata JACC.

Pada 16 Ogos lepas, Menteri Pengangkutan Datuk Seri Liow Tiong Lai berkata misi

mengesan MH370 membabitkan Malaysia, Australia dan China akan diteruskan di dasar Lautan Hindi.

Misi itu antara lain akan mencari kotak hitam dan bangkai pesawat MH370.

Penerbangan MH370 itu hilang dari imbasan radar ketika dalam penerbangan ke Beijing dari Kuala Lumpur pada 8 Mac tahun lepas. Pesawat itu membawa 239 penumpang dan anak kapal.

**© 2015 Astro Awani Network Sdn. Bhd. (535275-D) All Rights Reserved.**

Source: <http://www.astroawani.com/berita-malaysia/perancis-selesaikan-siasatan-fasa-pertama-terhadap-flaperon-mh370-jacc-70521>